

草木典第一百六十卷

甘草部彙考

釋名

苓 詩經

藟 爾雅

大苦 爾雅

甘草 詩傳

蜜甘 別錄

蜜草 別錄

美草 別錄

露草 別錄

國老 別錄

粉草 綱目

偷蜜珊瑚 藥譜

甘草圖一



草甘州府



草甘州汾



詩經 邶風簡兮

山有榛隰有苓

傳

苓大苦

注

苓本草云甘草

疏

釋草云藟大苦孫炎曰本草云藟今甘草是也蔓

延生葉似荷青黃其莖赤有節節有枝相當或云藟似地黃

唐風采苓

采苓采苓首陽之巔

傳

苓大苦也

爾雅

釋草

藟大苦

注

今甘草也蔓延生葉似荷青黃莖赤有節節有枝相當或云藟似地黃

疏

藥草也藟一

名大苦郭云今甘草也蔓延生葉似荷青黃莖赤有節節有枝相當或曰藟似地黃詩唐風云采

苓采苓首陽之巔是也藟與苓字雖異音義同

陸佃埤雅

苓

爾雅曰藟大苦今之甘草是也本草云一名國老解百藥毒安和七十二種石一千二百種草故號

國老之名國老者賓師之稱蓋藥有一君二臣三佐四使苓者又其賓師也故藥罕不用者雖非其

君而君實宗焉蔓生葉狀似荷少黃莖赤有節節間有枝相當喜生下濕詩曰隰有苓是也晉風曰采苓采苓首陽之巔采苦采苦首陽之下采葑采葑首陽之東苓甘者苦苦者蓋言讒人無所不至其害人也必因其似而譖焉采苓則因人之所甘而譖之之況也采苦則因人之所苦而譖之之況也葑則有時而甘亦有時焉而苦采葑則又因人之所甘所苦而併譖之之況也一章曰人之爲言苟亦無信舍施舍施苟亦無然人之爲言胡得焉二章曰苟亦無與三章曰苟亦無從者此言獻公好聽讒而主讒者之詞也蓋苓生於隰葑生於圃則首陽之巔不必有苓其下也不必有苦其東也不必有葑則理可以無信矣然而獻公乃以謂之人也爲此首陽采苓采苦采葑之言苟亦無信令我舍此采苓采苦采葑之人苟亦無然無與無從則人之爲此言也安從而得之哉凡此則以好聽故也故序曰好聽讒焉

羅願爾雅翼 藟

藟大苦今之甘草味甘而無毒能安和七十二種石千二百種草故於人譬之國老不入君臣佐使之列雖非君而爲君所宗以其能變和故也詩稱山有榛隰有藟以況西方之美人又采藟首陽之

巔以刺獻公之信讒蓋一章采藟二章采苦三章采葑藟甘而苦苦讒者之入人必先甘而後苦而葑則甘苦相半所謂采葑采菲毋以下體下體惡而上體美者也則讒人之所以嘗試其君者無所不用矣此草蔓生葉似荷青黃莖赤有節節有枝相當然不惟葉似荷古之蓮字亦通於藟故龜策列傳稱龜千歲乃游蓮葉之上徐廣曰蓮一作苓聲相近借字也將以龜老而神故形小而陸游以爲奇若水中之蓮凡龜皆可游不足言矣又詩采苓以首陽之巔叶之豈藟亦蓮音耶然藟甘而名大苦者猶牽牛有三黑點而名爲三白點此蓋秦俗所沿見禮記或素或青注

毛詩名物解 苓

苓大苦也所以和百藥之性使之相爲用者也故苓從令簡兮曰山有榛隰有苓榛非宜山而不宜隰苓非宜隰而不宜山故榛有植於樊棘之內苓或采於首陽之巔榛也苓也其生不擇地而美者也猶之賢者無所進而不自得焉

本草綱目 甘草釋名

陶弘景曰此草最爲衆藥之主經方少有不用者猶如香中有沈香也國老卽帝師之稱雖非君而

爲君所宗是以能安和草石而解諸毒也

甄權曰諸草中甘草爲君治七十二種乳石毒解一

千二百種草木毒調和衆藥有功故有國老之號

集解

別錄曰甘草生河西川谷積沙山及上郡二月八月除日采根暴乾十日成

陶弘景曰河西上

郡今不復通市今出蜀漢中悉從汶山諸夷中來赤皮斷理看之堅實者是抱罕草最佳抱罕乃西羌地名亦有火炙乾者理多虛疎又有如鯉魚腸者被刀破不復好青州間有而不如又有紫甘草細而實乏時亦可用

蘇頌曰今陝西河東州郡皆有之春生青苗高二三尺葉如槐七月開紫

花似耐冬結實作角子如畢豆根長者三四尺粗細不定皮赤色上有橫梁梁下皆細根也采得去蘆頭及赤皮陰乾用今甘草有數種以堅實斷理者爲佳其輕虛縱理及細剗者不堪惟貨湯家用之謹按爾雅云藟大苦郭璞云藟似地黃又詩唐風云采芩采芩首陽之巔是也藟與芩通用首陽之山在河東蒲坂縣乃今甘草所生處相近而先儒所說苗葉與今全別豈種類有不同者乎

李時珍曰按沈括筆談云本草註引爾雅藟大苦之註爲甘草者非矣郭璞之註乃黃藥也其味極

苦故謂之大苦非甘草也甘草枝葉悉如槐高五六尺但葉端微尖而糙濇似有白毛結角如相思角作一本生至熟時角坼子扁如小豆極堅齒嚙不破今出河東西界寇氏衍義亦取此說而不言大苦非甘草也以理度之郭說形狀殊不相類沈說近之今人惟以大徑寸而結緊斷紋者爲佳謂之粉草其輕虛細小者皆不及之鑑續霏雪錄言安南甘草大者如桂土人以架屋不識果然否也

根修治

雷斅曰凡使須去其頭尾尖處其頭尾吐人每用切長三寸擘作六七片入磁器中盛用酒浸蒸從已至午取出暴乾剉細用一法每觔用酥七兩塗炙酥盡爲度又法先炮令內外赤黃用 李時珍曰方書炙甘草皆用長流水蘸濕炙之至熟刮去赤皮或用漿水炙熟未有酥炙酒蒸者大抵補中宜炙用瀉火宜生用

氣味

甘平無毒

寇宗奭曰生則微涼味不佳炙則溫

王好古曰氣薄味厚升而浮陽也入足太

陰厥陰二經

李時珍曰通入手足十二經

徐之才曰木苦參乾漆爲之使惡遠志反大戟

芫花甘遂海藻

甄權曰忌猪肉

李時珍曰甘草與藻戟遂芫四物相反而胡洽居士治痰

癖以十棗湯加甘草大黃乃是痰在隔上欲令通泄以拔去病根也東垣李杲治項下結核消腫潰堅湯加海藻丹溪朱震亨治癆瘵蓮心飲用芫花二方俱有甘草皆本胡居士之意也故陶弘景言古方亦有相惡相反並用乃不爲害非妙達精微者不知此理

主治

本經曰五臟六腑寒熱邪氣堅筋骨長肌肉倍氣力金瘡癰解毒久服輕身延年

別錄曰溫中

下氣煩滿短氣傷臟欬止渴通經脈利血氣解百藥毒爲九土之精安和七十二種石一千二百種草 甄權曰主腹中冷痛治驚癇除腹脹滿補益五臟腎氣內傷令人陰不痿主婦人血瀝腰痛

痛凡虛而多熱者加用之

大明曰安魂定魄補五癆七傷一切虛損驚悸煩悶健忘通九竅利

百脈益精養氣壯筋骨

李杲曰生用瀉火熱熟用散表寒去咽痛除邪熱緩正氣養陰血補脾

胃潤肺

王好古曰吐肺痿之膿血消五發之瘡疽

李時珍曰解小兒胎毒驚癇降火止痛

梢主治

張元素曰生用治胃中積熱去莖中痛加酒煮延胡索苦楝子尤妙

頭主治

朱震亨曰生用能行足厥陰陽明二經汗濁之血消腫導毒

李時珍曰主癰腫宜入吐藥

發明

朱震亨曰甘草味甘大緩諸火黃中通理厚德載物之君子也欲達下焦須用梢子

李杲曰甘

草氣薄味厚可升可降陰中陽也陽不足者補之以甘甘溫能除大熱故生用則氣平補脾胃不足而大瀉心火炙之則氣溫補三焦元氣而散表寒除邪熱去咽痛緩正氣養陰血凡心火乘脾腹中急痛腹皮急縮者宜信用之其性能緩急而又協和諸藥使之不爭故熱藥得之緩其熱寒藥得之緩其寒寒熱相雜者用之得其平

王好古曰五味之用苦泄辛散酸收鹹斂甘上行而發而本

草言甘草下氣何也蓋甘味主中有升降浮沈可上可下可外可內有和有緩有補有泄居中之道盡矣張仲景附子理中湯用甘草恐其僭上也調胃承氣湯用甘草恐其速下也皆緩之之意小柴胡湯有柴胡黃芩之寒人參半夏之溫而用甘草者則有調和之意建中湯用甘草以補中而緩脾

急也鳳髓丹用甘草以緩腎急而生元氣也乃甘補之意

又曰甘者令人中滿中滿者勿食甘

甘緩而壅氣非中滿所宜也凡不滿而用炙甘草爲之補若中滿而用生甘草爲之瀉能引諸藥直至滿所甘味入脾歸其所喜此升降浮沈之理也經云以甘補之以甘瀉之以甘緩之是矣 李

時珍曰甘草外赤中黃色兼坤離味濃氣薄資金土德協和羣品有元老之功普治百邪得王道之化贊帝力而人不知斂神功而已不與可謂藥中之良相也然中滿嘔吐酒客之病不喜其甘而大戟芫花甘遂海藻與之相反是亦迂緩不可以救昏昧而君子嘗見嫉於宵人之意與 蘇頌曰

按孫思邈千金方論云甘草解百藥毒如湯沃雪有中烏頭巴豆毒甘草入腹卽定驗如反掌方稱

大豆汁解百藥毒予每試之不效加入甘草爲甘豆湯其驗乃奇也又葛洪肘後備急方云席辯刺

史嘗言嶺南俚人解蠱毒藥並是常用之物畏人得其法乃言三百頭牛藥或言三百兩銀藥久與

親狎乃得其詳凡飲食時先取炙熟甘草一寸嚼之嚥汁若中毒隨卽吐出仍以炙甘草三兩生薑

四兩水六升煮二升日三服或用都淋藤黃藤二物酒煎溫常服則毒隨大小洩出又常帶甘草數

寸隨身備急若經含甘草而食物不吐者非毒物也三百頭牛藥卽土常山也三百兩銀藥卽馬兜

鈴藤也詳見各條

附方

傷寒心悸脈結代者甘草二兩水三升煮一半服七合日一服傷寒類要 傷寒咽痛少陰證甘草湯

主之用甘草二兩蜜水炙水二升煮一升半服五合日二服張仲景傷寒論 肺熱喉痛有痰熱者甘草

炒二兩桔梗米泔浸一夜一兩每服五錢水一鍾半入阿膠半片煎服錢乙直訣 肺痿多涎肺痿吐

涎沫頭眩小便數而不欬者肺中冷也甘草乾薑湯溫之甘草炙四兩乾薑炮二兩水三升煮一升

五合分服張仲景金匱要略 肺痿久嗽涕唾多骨節煩悶寒熱以甘草三兩炙搗為末每日取小便三

合調甘草末一錢服之廣和方 小兒熱嗽甘草一兩猪膽汁浸五宿炙研末蜜丸綠豆大食後薄

荷湯下十丸名涼膈丸聖惠方 初生解毒小兒初生未可便與硃砂蜜只以甘草一指節長炙碎

以水二合煮一合以綿染點兒口中可用一蜆殼當吐出胃中惡汁此後待兒饑渴更與之令兒智

慧無病出痘希少王璆選方 初生便閉甘草枳殼煨各一錢水半盞煎服全幼心鏡 小兒撮口發噤

用生甘草二錢半水一盞煎六分溫服令吐痰涎後以乳汁點兒口中金匱玉函 嬰兒目澀月內目

閉不開或腫羞明或出血者名慢肝風用甘草一截以豬膽汁炙為末每用米泔調少許灌之

幼効新書

小兒遺尿大甘草頭煎湯夜夜服之

危氏得効方

小兒尿血甘草一兩二錢水六合煎二合一歲小

兒一日服盡

姚和衆至寶方

小兒羸瘦甘草三兩炙焦為末蜜丸綠豆大每溫水下五丸日二服

金匱玉函

大人羸瘦甘草三兩炙每旦以小便煮三四沸頓服之良

外臺祕要

赤白痢下崔宣州衍所傳方用

甘草一尺劈破以淡漿水蘸水一升半煎取八合服之立效梅師方用甘草一兩炙肉豆蔻七個煨

剉以水三升煎一升分服

舌腫塞口不治殺人甘草煎濃湯熱漱頻吐

聖濟總錄

太陰口瘡甘

草二寸白礬一粟大同嚼嚙汁

保命集

發背癰疽崔元亮海上集驗方云李北海言此方乃神授

極奇祕用甘草三大兩生搗篩末大麥麪九兩和勻取好酥少許入內下沸水搜如餅狀方圓大於

瘡一分熱傅腫上以細片及故紙隔令通風冷則換之已成者膿水自出未成者腫便內消仍當喫

黃耆粥為妙又一法甘草一大兩火炙搗碎水一大升浸之器上橫一小刀子露一宿平明以物攪

令沫出去沫服之但是瘡腫發背皆甚效

蘇頌圖經

諸般癰疽甘草三兩微炙切以酒一斗同浸瓶

中用黑鉛一片鎔成汁投酒中取出如此九度令病者飲酒至醉寢後即愈也

經驗方

一切癰疽

諸發預期服之能消腫逐毒使毒不內攻功效不可具述用大橫文粉草二觔搥碎河水浸一宿揉取濃汁再以密絹過銀石器內慢火熬成膏以磁罐收之每服一二錢無灰酒或白湯下曾服丹藥者亦解之或微利無妨名國老膏

外科精要方

癰疽祕塞生甘草二錢半井水煎服能疎導下惡物

直指方

乳癰初起炙甘草二錢新水煎服仍令人啞之

直指方

些小癰癰發熱時卽用粉草節

曬乾爲末熱酒服一二錢連進數服痛熱皆止

外科精要方

痘瘡煩渴粉甘草炙苦蘘根等分水煎

服之甘草能通血脉發瘡痘也

直指方

陰下懸癰生於穀道前後初發如松子大漸如蓮子數十

日後赤腫如桃李成膿卽破破則難愈也用橫文甘草一兩四寸截斷以溪澗長流水一盃河水并水不用以文武火慢慢蘸炙之自早至午令水盡爲度劈開視之中心水潤乃止細剉用無灰好酒二小盃煎至一盃溫服次日再服便可保無虞此藥不能亟消過二十日方得消盡興化守康朝病已破衆醫拱手服此兩劑卽合口乃韶州劉從周方也

李迅癰疽方

陰頭生瘡蜜煎甘草末頻頻塗

之神效

千金方

陰下濕痒甘草煎湯日洗三五度

古今錄驗

代指腫痛甘草煎湯漬之

千金方

凍瘡發裂甘草煎湯洗之次以黃柏黃連黃芩入輕粉麻油調傳

談野翁方

湯火瘡灼甘草炙蜜

塗

李樓寄方

蠱毒藥毒甘草節以真麻油浸之年久愈妙每用嚼嚙或水煎服神效

直指方

小兒

中蠱欲死者甘草半兩水二盞煎五分服當吐出

金匱玉函

牛馬肉毒甘草煮濃汁飲一二升或煎

酒服取吐或下如渴不可飲水飲之即死

千金方

飲饌中毒未審何物卒急無藥只煎甘草薺芎

湯入口便活

金匱玉函

水薺芎毒菜中有水薺芎葉圓而光有毒誤食令人狂亂狀若中風或作吐

以甘草煮汁服之即解

金匱玉函妙方

甘草部藝文

詩

司馬君實遺甘草杖

宋梅堯臣

美草將爲杖孤生馬嶺危難從荷篠雙窻入化龍陂去與秦人採來扶楚客衰藥中稱國老我懶豈能醫

甘草部紀事

法苑珠林晉沙門釋開達隆安二年登隴採甘草爲羌所執時年大饑羌胡相噉乃置達柵中將食之先在柵中十有餘人羌日夕烹葅唯達尙存自達被執便潛誦觀世音經不懈於心及明日當見

噉其晨始曙忽有大虎遙逼羣羌奮怒號吼羌各駭怖奔走虎乃前噬柵木得成小缺可容人過已而徐去達初見虎噬柵謂必見害柵既穿不入心疑其異謂是觀世音力計諸羌未及便卽穿柵逃走夜行晝伏遂得免脫

梁書宕昌國傳宕昌國在河南之東南益州之西北隴西之西羌種也宋孝武世其王梁瓚忽始獻方物天監四年王梁彌博來獻甘草當歸詔以爲使持節都督河涼二州諸軍事安西將軍東羌校尉河涼二州刺史隴西公宕昌王佩以金章

畫瓚錄郭詎性善謔工詞曲以選人入市易務不數年至中行元祐初釐校市易復以爲承議郎親知每見之必詰問所因郭詞吃不能答作河傳詠甘草以見意云大官無悶剛被傍人競來相問又難爲細細數陳且祇將甘草論朴硝大戟并銀粉疏風緊甘草閒相混及至下來轉殺他人爾甘草有一分

甘草部雜錄

夢溪筆談本草注引爾雅云藟大苦注甘草也蔓延生葉似荷青莖赤此乃黃藥也其味極苦謂之

大苦非甘草也甘草枝葉悉如槐高五六尺但葉端微尖而糙澀似有白毛實作角生如相思角作一本生熟則角坼子如小匾豆極堅齒嚙不破

甘草部外編

酉陽雜俎秀才權同休友人元和中落第旅遊蘇湖間遇疾貧窘走使者本村野人雇已一年矣疾中思甘葶湯令其市甘草雇者久而不去但具火湯水秀才且意其怠於祇承復見折樹枝盈握仍再三搓之微近火上忽成甘草秀才心大異之且意必有道者良久取麤沙數掬援按已成葶矣及湯成與甘葶無異疾亦漸差

甘遂部彙考

釋名

甘遂 別錄

甘藹 別錄

陵藹 別錄

陵澤 別錄

主田 別錄

重澤 別錄

甘澤 綱目

苦澤 綱目

白澤 綱目

鬼醜 綱目

隨陽給事中 藥譜